

ኢብራዊታስ ፃፊቲዳ ኪታ ጊዳ ቆፋ

ሃይሲ ሃ ኪታዚ ፃፊቲዳይ ኢስታ ቦላ ጋኪዳ ጊታ ሜቶዛ ጌዶን ባ አማኖ አጋናሰ ማቲዳ አማኒዛ አሳ ጊሻሳ። ሃይሳ ፃፊዳይይ ኢብራዊፔ አማኒዳይታስ ዩሱስ ኪርሰቶሲ ቱማኔ ወርሴላን ያሲ አሳ ናሰ ቆንጨሲዳይ ያሳ ናይ ኢዛ ጊዲዳይሳ ቤሳናሳ። ሃ አማኒዛይቲ ባ አማኖን ሚኒ ኤቃና ማላ ኢዚ ኢስታ ሚንጮሴስ። ሄሲካ ቱሙ ጊዲዳይሳ ሄቭ ቱማ ዮጆታ ቆንጨሲ ቤሴስ።

1. ባ ኤኪዳ ሜቶዛ ባጋራ ባ አዋስ ቱማፔ አዛዜቲዛይ ጊዲዳ ጊሽ ካሴ ጋልዓ ጫቆ ማፃፋን ዲዛ ናቤታፔ፣ ሙሴፔኔ ኪታንቻታፔካ ኬሂ አዴሰ።

2. ዩሱሲ ካሴ ጋልዓ ጫቆ ዎዴ ቄሴታፔካ ኬሂ አዲዛ ሜርና ቄሴይ ኢዛ ጊዲዳይሳ ያሲ ባ ዲናን ዮቲዳስ።

3. አማኒዛይይ ናጋራፔ፣ ባቦፔኔ ሃይቆፔ ዩሱሳ ባጋራ አታና። ዩሱሲ ቄሴታ ሃላቃ ጊዲዳ ማላ ኢብራዊታ አማኖ ዎጋቲኔ ሜሄታ ያርሾይ ጮ ማላ ኤሾ ማላ ጊዲዳ አቶቴላይ ኢዚ ቱማ ጊዳና ማላ ኦሲዳስ።

ሃ ማፃፋ ፃፊዳይይ ኢስራዔል ናይታ ታሪኬን ኤሬቲዳ አሳታ አማኖ ለሚሶ ጎዔቲዲ (ሼዎፖ 11) ናባቢዛ አሳይ አማኖን ሚናና ማላ ቆፊሴስ። ሄሳሶካ (ሼዎፖ 12) ቦላ ናባቢዛ አሳይ ባ አይሬ ዩሱሳ ቦላ ሎዔሲ ዎሲዲ አማኖን ሚናና ማላኔ አይ ሜቶይኔ ዎዩይካ ኢስታ ቦላ ጋኪኮካ ዳንዲያና ማላ ዞሬስ። ወርሴላንካ ኢዚ ኢስታስ ዲማ ዲማ ዞሬኔ ሴራ ቃላ ኢሚዲ ኩዩስ።

- ሃ ማፃፋይ ኦይኪዳ ኩሜላ ቆፋ
- ጌሎሶ፣ ያሲ ባና ኪርሰቶሳ ባጋራ ቆንጨሲዳስ 1:1-3
- ኪርሰቶሲ ኪታንቻታፔ ቦላ ጊዳሳ 1:4-2:18
- ኪርሰቶሲ ሙሴፔኔ ኢያሱፔ ቦላ 3:1-4:13
- ኪርሰቶሳ ቄሴቴሳ 4:14-7:28
- ኪርሰቶሳ ጫቆ ቃላ ቦላቴሳ 8:1-9:22
- ኪርሰቶሳ ያርሾቴላ ቦላቴሳ 9:23-10:39
- አማኖ ባይራቴሳ 11:1-12:29
- ያሳ ኤፋይሶ 13:1-19
- ወርሴላ ዎሳ 13:20-21

ኩሻ ቆፋ 13:22-25

ጾሳይ ባ ናዛ ባጋራ ዮተዳሰ

1 በኔ ዋዴፔ ኦይኪዲ ጾሲ ዲማ ዲማ ኦጌራ ናቤታ ባጋራ ካሴ ኦ ኣዋታሰ ዳሮ ዋዴ ዮተዳሰ። 2 ቃሴ ሃይሳ ወርሴላ ዋዴ ቦላ ወርሲ ላተሲዳዴኔ ሃ ኣላሚዛ ሜዲዳ ባ ናዛ ባጋራ ኦሰ ዮተዳሰ። 3 ኢዚካ ጾሳ ቦንቾ ቤሲዛዴኔ ጾሳ ጾሳቴላሰ ሎዖ ለሚሶ ጊዲዲ ባ ዋልቃማ ቃላን ወርሲካ ሺሺ ኦይኪዴሰ። ኢዚ ኣሳ ናጋራፔ ጌሺዳፔ ጉዬ ሳሎን ቦንቾ ጾሳ ኡሻቻን ኡተዳሰ።

ጾሳ ናይ ኪታንቻታፔ ኣዴሰ

4 ሄሳ ጊሽ ኢዛሰ ኢሜቲዳ ሱንላይ ኪታንቻታ ሱንላፌ ኦዲዛይሳ ማላ ኢዚካ ኪታንቻታፔ ኬሂ ኣዴሰ። 5 ጾሲ ኪታንቻፔ “ኔኒ ታ ና፤

ታ ኔና ሃቺ ዬላዲሰ።
ዋይኮ
ታ ኢዛሰ ኣዋ ጊዳና፤
ኢዚካ ታ ና ጊዳና”

ኦናሰ ጊዴ? 6 ቃሴካ ጾሲ ባ ባይራ ናዛ ዲጌ ሃ ቢታ ቦላ ዬዲሺ “ጾሳ ኪታንቻቲ ወሪካ ኢዛሰ ጎይኔቶ” ጊዴሰ። * 7 ኪታንቻታ ጊሽ ሃሳዬሺ ቃሴ “ኪታንቻታ ኣያናታ፤ ባ ኣሳንቻታካ ታማ ላጮ ኬሴሰ” ጊዴሰ። * 8 ናዛ ጊሽ ቃሴ “ጎዶ! ኔ ዙፋኔይ ሚርናፔ ሚርና ጋካናሰ ሚኒ ዳና። ኔኒ ኔ ካዋቴላ ሊኬ ካሌላሳ። 9 ኔኒ ዪሎቴላ ደሳዳሳ፤ ማካላካ ኢፃሳ፤ ሄሳ ጊሽ ጾሲ ኔ ጎዳይ ኔና ኔ ላጌታፔ ቦላ ኬሲዴሰ። ኔና ኡፋይሳ ዛይቴ ቴዩዴሰ” ጌሰ። 10 ቃሴ “ጎዶ ኔኒ ኮይሮ ቢታ ሚዳዳሳ። ሳሎቲካ ኔ ኩሺን ኦሴቲዳ። 11 ኢሰቲ ዳያና፤ ኔኒ ጊዲኮ ሚና ዳና። ኢሰቲ ወሪካ ማይዖ ማላ ጋልዳና። 12 ኔኒ ኢሰታ ማይዖ ማላ ቃላሞዳና። ኢሰቲካ ማይዖ ማላ ላሜታና። ኔ ጊዲኮ ኣይዴካ ኔኒ ኔና። ኔ ዲሳሰ ወርሴሊ ዳና” ጌሰ። 13 ጾሲ ኪታንቻታፔ “ታኒ ኔ ሞርኬታ ኔ ቶሆ ጋርሳን ዬዲሳና ጋካናሰ ኔ ታ ኡሻቻን ኡታ” ኦና ጊዴ? *

14 ኪታንቻቲ ወሪካ ኣቶቴላ ላታና ኣሳታ ኦላናሰ ጾሳፌ ኪቴቲዛ ኦሳንቻ ኣያና ጊዴቴኔ?

* 1:6 ዛሬ 32:43 * 1:7 ማዛ 104:4 * 1:13 ማዛ 110:1

2

ጌታ ማርቴል

1 ሄሳ ጊሽ ኑኒ ሲዩዳ ቃላፔ ባሌቲዲ ኩንደንታ ማላ ኑ ሲዩዳ ቃላ ሎዔል ናጋናሰ ቤሴሰ። 2 አዛሰ ጊኮ ካሴ ኪታንቻታ ባጋራ የቴቲዳ ቃላይ ቱሙ ጊዲዳ ሄ ቃላ ዩዲ አዲዳይ ባሰ ቤሴዛ ቁፀቴ ኤኬሰ። 3 ኑ ቃሴ ሄሳ ማላ ጌታ ማርቴል ጮ ለፕ ሂሰቲኮ ዋኒ አታኔ? ሃይሲ ማርቴላይ ኮይሮ ጎዳ ባጋራ ኑሰ የቴቲዳሰ። ኢዛፔ ሲዩዳይቲካ ኑሰ ጌሺ የቲዳ። 4 ያሲ ቃሴካ ማላታታ፡ ማላሊሲዛ ማሻታ፡ ዲማ ዲማ ማላታታ ኦሶኒኔ ባ ሼኔ ማላ ኢሚዳ ደሎ አያና ኢሞታታ ባጋራ ኢሰታ ማርካቴላ ሚንሊዴሰ።

አሳ ዜሬል አሺዳይ ዩሱሳ

5 ያሲ ሃይሳ ኑ ኢዛ ጊሽ ሃሳዪዛ ቡሮ ያና አላሚዛ ኪታንቻሰ ሃርሲቤና። 6 ጊዶ አቲን ጌሻ ማፃፋይ ሃራሶን

“ኔ ኢዛሰ ዩሻ ቆፓናሰ አሲ አዜ?

ኢዛሰ ኔ ቆፓናሰ አሳናይ ኢዚ አዜ?

7 ኔ ኢዛ ኪታንቻታፔ ጉላራ ጉላዳሳ።

ቦንቾ ዛወዴ ን ጋላታ ኢዛ ሁዔን ዋላዳሳ።

ኔኒ ኢዛ ኔ ኩሼ ኦሶታ ቦላ ሹማዳሰ።

8 ኔ ዉርሳካ ኢዛ ቶሆ ጋርሳን ሃሪሳዳሳ፤

ያሲ ኡባካ ኢዛፔ ጋርሳራ ኢዛሰ ሃሪሲሺን አቲዳይ አይ ሚሺካ ዳና።

ጊዶ አቲን ሃዒ ቃሴ ዉሪካ ኢዛሰ ሃሪቲሺን ኑ ቤይቤኮ”

ጊዴሰ። 9 ጊዶ አቲን ያሳ ኪያቴላን አሳ ኡባ ጊሽ ሃይቃናሰ ኪታንቻታፔ ጉላ ዋዴ ጉዲዳ ዩሱሲ ዋዬ ሃይቆ ሃይቁዲ ሃዒ ቦንቾ ን ጋላታ ዛወዴ ባ ሁዔን ዋሊዳይሳ ኑ ቤዮሰ። 10 ሃኒዛይ ዉሪካ ኢዛፔ ኢዛሰ ሜዴቲዳ ያሲ ዳሮ ናይታ ቦንቾሰ ኤፋናሰ ኢሰታ ማርቴላሰ ሁዔ ጊዲዳ ዩሱሲ ዋዬን ፖላናሰ ኮሺዛዛ ጊዲዳሰ።

11 አሰ ጌሺዛይኔ ኢዛን ጌዪዛ አሳይ ሃይቲ ኢሲ ኬላ አሳታ። ሄሳ ጊሽ ዩሱሲ ኢሰታ “ታ ኢሻቶ” ጊ ዪይጋናሰ ዩላቴና። 12 “ታኒ ኔ ሱንላን ታ ኢሻታሰ የታና ሺቁዳ ዴሬዛ ሲንላን ኔና ጋላቲዛ ዩላ ታ ዩፃና።” * 13 ሃሳሉካ “ታ ኢዛን አማኔታና” ቃሴካ “ታኒኔ ታሰ ያሲ ኢሚዳ ናይቲ ኑ ሃን ደሰ” ጌሰ ጌሻ ማፃፋይ። *

* 2:12 ማዛ 22:22 * 2:13 ኢሳ 8:17-18

14 ናይታሰ ኣሾይኔ ሱሊ ዲዛ ማላ ኢዚካ ኢሰታ ማላ ኣሳ። ሄሲካ ሃይቆ ቦላ ኢዛሰ ዋልቃይ ዲዛ ደቡሎሳ ኢዚ ባ ሃይቆ ዋልቃን ዛራናሳ። 15 ሄሳታካ ባ ዲዛ ዋይ ኡባን ሃይቆሰ ባቦን ሃራቲ ቃሹቲዳይታ ሃይቆፔ ዋዛናሳ። 16 ኢዚ ሃ ዩዳይ ኪታንቻታ ማዳናሰ ጊደንታ ኣብራሃሜ ዜሬላታ ማዳናሰ ዩዳሰ። 17 ሄሳ ጊሽ ኡባ ባጋራ ኢዚ ባ ኢሻታ ሚሳታናሰ ቤሲዛዳ ጊዲዳሰ፤ ኢዚ ሄሳ ኦሊዳይ ማሪዛዳኔ ኣማኔቲዳ ዋና ቄሴ ሃላቃ ጊዲዲ ፆሳሰ ኦላናሲኔ ዳሬዛ ናጋራፔ ማራናሳ። 18 ኢዚ ባ ሁዔን ፓጩቲዲ ሜቶ ኤኪዳ ጊሽ ፓጩቲዛይታ ማዳናሰ ደንዳዩሰ።

3

ዩሱሲ ሙሴፔ ኣጼሰ

1 ሄሳ ጊሽ ሳሎፔ ያይሲ ኢንቴና ጋኪን ኣማኒዛ ኑ ኣሻቶ! ኑ ኣማናሰ ሃዋሬኔ ቄሴታ ሃላቃ ጊዲዳ ዩሱሳ ቆፒቲ። 2 ሙሴይ ፆሳ ኬላ ኡባ ቦላ ኣማኔቲዳይ ጊዲዳ ማላ ዩሱሲካ ባና ሹሚዳዳሰ ኣማኔቲዳዳ። 3 ኬሌ ኬዲዳዳሰ ኬላፌ ቦላራ ቦንቾይ ዲዛ ማላ ዩሱሳሲካ ሙሴፔ ኣጼዛ ቦንቾይ ቤሲዛዳ ጊዳናሰ ቤሴሰ። 4 ኬሌ ኡባሰካ ኬዲዳዳይ ዳሰ፤ ጊዳ ኣቲን ዉርሲካ ኦሊዳዳይ ፆሳ። 5 ሙሴይ ቲንቢቲ ማርካቲሼ ፆሳ ኬላ ኡባ ቦላ ኢሲ ኣማኔቲዳ ኦሳንቻ ማላ ጊዲ ዳዒዳሰ። 6 ኪርሰቶሲ ጊዲኮ ፆሳ ኬላ ቦላ ኣማኔቲዳ ና ማላ። ኦኒካ ኢዛ ቦላ ኣማኔቲዛ ኡፋይሳይኔ ጩቄቲዛ ሂደታ ሎዔሊ ኦይኪኮ ኑ ኢዛሰ ዲሳ ኬላ።

ፆሳ ኣሳሰ ኢሚቲዳ ቆፊሶ ቃላ

7 ሄሳ ጊሽ ያሎ ኣያናይ ጊዛ ማላ
 “ኢንቴ ሃቾ ኢዛ ቃላ ሲዩኮ *
 8 ባዞ ቢታን ኢንቴ ታና ፓጩዳ ዋይ ማካሊዳይሳሶ
 ኢንቴ ዋዝና ሙሚሶፒቲ።
 9 ኢንቴ ኣዋቲ ካሴ ሄን ታና ፓጩዳኔ ታናራ ኤቄቲዳ።
 ታ ኦሊዳይሳ ዉርሲ ኦይዲ ታሙ ላይላ ጋካናሰ ቤዩዳ።
 10 ሄ ዋይ ዩሌቴላታ ቦላ ታ ሃንቄታዳ፤
 ኢሰታ ዋዝናይ ኡባ ዋይ ባሌቴሰ፤
 ኢሰቲ ታ ኦጌ ኤሪቤይቴና። 11 ቃሴ
 ‘ታ ኢሰታሰ ኢሚዛ ሹምፖሶ ኢሰቲ ሙሌካ ጌሌቴና!’ ጋዳ
 ታኒ ታ ሃንቆን ጫቃዲሰ” ጌሰ።

* 3:7 ማዛ 95:7-11

12 ታ አሻቶ! አንቴፌ ኦኒካ ዴፖ ያሳፌ ሃራሶ አንቴና ሃሲዛ ኢታኔ አማኖንታ ዋዝናይ ዶንታ ማላ ናጌቲቴ። 13 ሃራፔካ አንቴ ጋርሳፌ ኦኒካ ናጋራን ባሌቲዲ ባ ዋዝና ሙሚሶንታ ማላ “ሃኛ” ጌቲቲሽን ሃኛ ሃኛ አንቴ አንቴ ጋርሳን ሚኔቲቴ። 14 ኑሰ ካሴ ኮይሮፔ ዲዛ አማኖ ኑኒ ወርሴል ጋካናሰ ሎዔል ሚንላ ኦይኪኮ ኑኒ ከርሰቶሳራ ኢሲፌ ላታና።

15 ሄሲካ “አንቴ ሃኛ ኢዛ ቃላ ሲዪኮ ካሴ ማካሊዳይታይሳ ማላ ሃዒካ አንቴ ዋዝና አንቴ ሚንሶንታ ማላ” ጌቲቲ ጌሻ ማፃፋን ፃፊቲዳይሳሉ ሃኒዴሰ።

16 ሲይዲ ማካልዳይቲ ኢሰቲ ኦናንቴ? ሙሴይ ጊብፄፔ ካሌል ከሲዳይታ ኡባታ ጊዴቲኔ? 17 ያሲ ኢሰታ ሶላ ኦይዲ ታሙ ላይሳ ሃንቁቲዳይቲ ኢሰቲ ኦናንቴ? ናጋራ ኦሲን ኢሰታ አሃይ ባዞ ቢታን ኩንዲ አቲዳይታ ጊዴቲኔ? 18 ኢዛሰ አዛዜቶንታ አዲዳይታፔ አቲን ኢዛ ሸምፖሶ ጌሎንታ ማላ ኢዚ ጫቁ ዲጊዳይ ሃራይ ኦናንቴ? 19 ሄሳ ጊሽ ኢሰቲ ጌሎንታ አቲዳይ አማኖይ ባይንዳ ጊሽ ጊዲዳይሳ ኑ ኤርሰ።

4

ያሳ ዴሬሰ አሜቲዳ ሳምባታ ሸምፖ

1 ጌይ ሸምፖሶ ጌላናሰ አሜቲዳ ሂዶታይ ሃዒካ ናጌቲ ዲዛ ጊሽ አንቴ ጊዶፌ ኦኒካ ሄሳሰ ቤሶንታይ ጊዶንታ ማላ አኔ ናጌቶሰ። 2 ሄይታንታሰ ሳባኬቲዳ ማላ ኑሰካ ሚሺራኛ ቃላይ ሳባኬቲዳሰ። ጊዲኮካ ሲዪዳ አሳታራ ሲዪዳ ቃላይ ኢሰታራ አማኖን ዋላኬቶንታ አጊዳ ጊሽ ኢሰታ ማዲቤና። 3 ኑ ቃሰ አማኒዛይቲ ሄ ሸምፖሶዛ ጌላና። ያሲ “ሄሳ ጊሽ ታኒ ታ ሃንቆን ‘ኢሰቲ ታ ሸምፖሶ ሙሌካ ጌሌቲና’ ጋዳ ታ ጫቃዲሰ” ጊዴሰ። ጊዶ አቲን ሃይሲ አላሜይ ሜዴቶሳፔ ሃ ሲሚን ኢዛ ኦሶይ ፖሌቲዳሰ። * 4 ኢሲ ሶን ላፑንሉ ጋላሳ ጊሽ “ላፑንሉ ጋላሲ ያሲ ኦሶ ኡባፌ ሸምፒዳሰ” ጌቲቲ ጌሻ ማፃፋን ፃፊቲዳሰ። * 5 ቃሴካ ሄ ሶዛን “ቲማፔ ኢሰቲ ታ ሸምፖሶ ሙሌካ ጌሌቲና” ጌሰ። * 6 ኢዛ ሸምፖሶ ቡሮ ጌላና ኢሲ ኢሲ አሳቲ ዴቲሰ። ካሴ ኢሰታሰ ሚሺራኛ ቃላይ ሳባኬቲዳይቲ አዛዜቶንታ አዲዳ ጊሽ ኢዛ ሸምፖሶ ኢሰቲ ጌሊቤቲና። 7 ሄሳ ጊሽ ያሲ “ሃኛ” ጊዲ

* 4:3 ማዛ 95:11 * 4:4 ሜዴ 2:2 * 4:5 ማዛ 95:11

ቃሴካ ሃራ ጋላስ ዋሊዳስ፤ ሄሲካ ዳር ላይላታፔ ጉዬ ዳወቴ ባጋራ

“ሃቶ ኢንቴ ኢዛ ቃላ ሲዪኮ ኢንቴ ዋኸና ሙሚሶፒቴ”

ጌቴቴ ካሴ ዮቴቴዳ ማላ ሃኒዳስ። * 8 ኢያሶይ ኢሰታስ ሼምፖ ኢሚዳኮ ያሲ ሃራ ጋላስ ጌዲ ዮቴናኮሺን። *

9 ሃሳ ጊሽ ሳምባታ ጋላስ ሼምፖይ ያሳ ዳሬስ ሃዒካ ዳስ።

10 ጋሶይካ ያሳ ሼምፖሶ ጌሊዛይ ዉሪ ያሲ ኦሊ ሼምፒዳ ማላ ኢዚካ ባ ኦሶፔ ሼምፓና። * 11 ሃሳ ጊሽ ኦኒካ ሄይታንታ ማላ ኣዛዜቶንታ ኢዲዳይሳ ለሚሶ ካሊዲ ኩንዶንታ ማላ ሄ ሼምፖሶዮ ጌላናስ ኦኔ ሚናስ።

12 ያሳ ቃላይ ፓፃ ዲዛይሳኔ ኦሊዛ ቃላ። ናምዑ ባጋ ቃራ ማሻፊካ ኣጂ ቃራ፤ ሼምፖኔ ኣያና፣ ሻያኔ ኮልቼካ ሻካና ጋካናስ ጫዳስ፤ ዋዚና ቆፋኔ ኣሞቴላካ ፓጪ ዌሌስ። 13 ያሳ ኣይፊፔ ጌሜቴዳ ሜዴታይ ሙሌካ ዳና። ኑ ኢዛስ ኑ ጊሽ ዛር ኢማናስ ቤሲዛ ኢዛ ሲንሳን ሃናይ ዉሪካ ካሎ ቆንጩን ቤታና።

ቄሴታ ሃላቃ ዩሱሳ።

14 ሃሳ ጊሽ ፑዴ ሳሎ ቢዳ ቄሴታ ሃላቃ ያሳ ና ዩሱሲ ኑስ ዲዛ ጊሽ ኣኔ ኑኒ ኑ ኣማኖ ሚንሊ ኦይኮስ። 15 ኑ ዳቡሪሺን ኑስ ቃዴታና ዳንዳዪዛ ቄሴታ ሃላቃይ ኑስ ዳስ። ኢዚ ኑ ማላ ኡባ ሚሻን ፓጩቴዳስ፤ ጌዲኮካ ኢዚ ኣይኮ ናጋራካ ኦሊቤና። 16 ሃሳ ጊሽ ኑኒ ማርቴላ ኤካናሲኔ ኑና ኮሺዛ ዋዴ ኑና ማዲዛ ኢዛ ኪያቴላ ኑ ዴማና ማላ ጌዴ ኢዛ ማርቴላ ኣልጋኮ ኣኔ ኣማኖን ሺቆስ።

5

1 ቄሴታ ሃላቃ ጌዲ ሹሜቴዛዳይ ዳር ኣሳ ጌዶፊ ዶሬቴሴኔ ኣሳ ጊሽ ጌዲዲ ኣምታኔ ናጋራ ጊሽ ያርሾ ሺሻናስ ዶሬቴስ።

2 ኢዚካ ባ ባጋራ ዳቡራንቻ ጌዲዳ ጊሽ ኤርንታ ኣሳታሲኔ ኦጌ ባሊዳይታስ ቃዴታና ዳንዳዪዳ። 3 ኢዚ ባ ናጋራ ጊሺኔ ሃራ ኣሳታ ናጋራ ጊሽ ያርሾ ሺሻናስ ኢዛስ ቤሲዛይ ሃሳ ጊሻሳ። * 4 ኣርኔይ ዌይጌቴዳይሳላ ኢዚ ያሲ ዌይጌዳዴ ጌዳናስ ቤሴስ ኣቴን ሃሳ ሄ ቦንቸዛ ባርካ ባስ ኤኪዛዳይ ዳና። *

* 4:7 ማዛ 95:7-8 * 4:8 ዛሬ 31:7፤ ኢያ 22:4 * 4:10 ሜዴ 2:2

* 5:3 ለዌ 9:7 * 5:4 ኪሳ 28:1

5 ሄሳሶካ ከርሰቶሲ ቄሴታ ሃላቃ ጊዳና ቦንቾ ባርካ ባሰ ኤኪቤና። ጊዶ አቲን

“ኔ ታ ናኮ፤

ታ ኔሰ ሃቾ አዋ ጊዳዲሰ”

ጊዳ ያሳፌ ኤኪዳሰ። * 6 ሄሳሶካ ሃራሶን

“ማልኬደዳቄ ሹሜታ ማላ

ኔኒ ሜርናሰ ቄሴታ ሃላቃ” ጌሰ። *

7 ዬሱሲ ሃይሳ ቢታ ቦላ ዲዛ ዎዴ ኢዛ ሃይቆፔ አሻና ዳንዳዩዛይሳኮ አፋንዲሼ ጊታ ቃላራ ዎሳ ዎሲዳሰ። አዳፌ አሽኬቴላራ ኢዚ አዛዜቴዳ ጊሽ ኢዛ ዎሳ ያሲ ሲዩዳሰ።

* 8 ኢዚ ያሳ ና ጊዳኮካ ባ ኤኪዳ ዋዬዛፔ አዛዜቴላ ታማሪዳሰ። 9 ሄሳ ባጋራ ፓጩይ ባይንዳዳ ጊዳ ቤቴዳይሳፌ ጉዬ ባና አዛዜቴዛይታሰ ኡባሰ ሜርና አቶቴላሰ ጋሶ ጊዳዳሰ።

10 ማልኬደዳቄ ሹሜቴላ ማላ ቄሴታ ሃላቃ ጌቴቲ ያሳን ሹሜቴዳሰ።

አማኖን ሚናና ማላ ኢሜቴዳ ቆፍሶ

11 ሄሳ ጊሽ ኑ ሃሳያና ሚሺ ቡሮ ዳርይ ዳሰ። ጊዶ አቲን አንቴ ደታዓታ ጊዳዳ ጊሽ አንቴና ኤሪሶይ ሜቶ። 12 አንቴ ሃኒ ዎዴ አሰታማሪ ጊዳናሰ ቤሲሺን ያሳ ቃላ ቡሮ ኮይሮፔ ዳንሉዲ አንቴና ታማርሲዛ አሰ አንቴሰ ኮሺሰ። አንቴሰ ኮሺዛይ ሚኖ ካል ጊዶንታ ማላ። 13 ማላ ፓሃቴዛይ ቂ ጉላ ና ጊዳዛ ጊሽ ሎዖኔ ኢታ ሻኪዛ ቲሚርቴ ሻኪ ኤሬና። 14 ሚኖ ካል ጊዳኮ ሎዖኔ ኢታ ሻካናሰ ባናቴላ ደሲሲዳ ዎዝና ኩንሉዳ አሳታሳ።

6

1 ሄሳ ጊሽ ኮይሮፔ ከርሰቶሳ ጊሽ ኢሜቴዳ ቲሚርቴዛ አጊዲ አኔ ጌዴ ሚኖ ቲሚርቴኮ ቦሰ። ሃይቂዳ ኦሶፔ ማርቴላን ጌሎ ጊሺኔ ያሳን አማኖ ጊሽ ቡሮ አኔ ኢዛን ዎጂ ማጾኮ። 2 ሄሳሶካ ዊንቃቴ ጊሺኔ ኩሼ አሳ ቦላ ዎላ ጊሽ ቃሴካ ሃይቂዳያታ ዳንላ ጊሺኔ ሜርና ፐርዳ ጊሽ ቡሮ ዎላ ደሞኮ። 3 ያሳ ሺኔ ጊዳኮ ኑ ሄሳሶ አላና።

4 ባ አማኖ ካዲዳ አሳታ ኢሰታ ማርቴላን ዎሰቲ ዘራኔ? ፖያይ ኢሰታሰ ኢሲቶ ፖዲዳይታ ሳሎ ኢሞቴላ ኤኪ ቤዩዳይታ። ዲሎ

* 5:5 ማዛ 2:7 * 5:6 ማዛ 110:4 * 5:7 ማቶ 26:36-46፤ ማር 14:32-42፤ ሉቃ 22:39-46

አያና ኤኪ ቤዩዳይታ፣ 5 ሎፖ ያሳ ቃላኔ ቡሮ ያና አላሜዛ ዋልቃ ኤኪ ቤዩዳይታ፣ 6 ዛሪዲ ካዲዳይታ ኢስታ ናሞዓንፊ ዛሪዲ ማርቴላን ኤኮይ ዳንዳዬቴና። ጋሶይ ኢስቲ ባ ሞርሰ ያሳ ና ዛሪ ካቄቴሰኔ ካዉሼቴሰ።

7 ኡባ ዋዴ ባ ቦላ ኢራ ኡዪዛ ቢታይ ቃሴካ ኢዛ ጎይዛዴሰ አይፌ አሚዛ ቢቲያ ያሳ አቻን አንጃታዲሰ። 8 ጊዶ አቲን አጉንሊኔ ኦዶሮይ ሞኪዛ ቢታያ ጎዓይ ቤዩዳሮ ጊዳና። ሄ ቢታይሰ ቃንጌቴላ ማታን ዴሰ። ኢዚ ዉርሴላ ታማን ፀጌቴላ ጊዳና። *

9 ታ አሻቶ! ኑኒ ሄሳፉ ሃሳይኮካ አንቴሰ አንቴ አቶቴላራ ኦይኬቴዳ ሎፖ ሚሽ ዲዛይሳ ኑ ሲጾኮ። 10 ካሴ ጊዲን ዋይኮ ሃዒ ጊዲንካ አንቴ አማኒዛይታ ማዲዳይሳኔ ኢዛ ሱንላ ጊሽ አንቴ ቤሲዳ ሲቆቴላ ባላናሰ ያሲ ማካላንቻ ጊዳና። 11 አንቴሰ አሜቴዳ ሂዶታይ ፖሌታና ጋካናሰ አንቴፌ ኢሲ ኢሲ አሲ ሄሳ ማላ ኦሶ ዉርሴላ ጋካናሰ ጌንጨዲ ኦላና ማላ ኑ አሞቶሰ። 12 አማኖኒኔ ዳንዳያን አንቴ ኢዛ ሂዶታ ቃላ ላቴዛይታ ሚሳታናፕ አቲን ዶታዓታ ጊዳናይሳ ኑ ኮኖኮ።

ያሲ አሚዳ ሂዶታ ቃላ ቱማቴላ

13-14 ያሲ ኢብራሃሚሰ ሂዶታ አሚዳ ዋዴ ጫቂሽ ሃራ ኢዛፕ አጲዛዴይ ባይንዳ ጊሽ ባርካ ባናን፣ “ታ ኔና ቱማፔ አንጃና፤ ታኒ ኔ ዜሬላ ዳርሳና” ጊ ጫቂዴሰ። * 15 ኢብራሃሚይካ ጌንጨ ናጊዳፕ ካሊዲ ኢዛሰ አሜቴዳ ሂዶታ ዴሚዴሰ።

16 አሳይ ጫቆ ጫቂሽ ባፔ ጾቃን ጫቄሰ። ጫቆዚካ ጌቴቲዳይሲ ፖሌታና ማላ ሚንሊዛ ጊሽ ጫቂዳይታ ጊደን ፓላማይ ዴንዲኮ ካሴ ጫቆ ቃላይ ዲጌሰ። 17 ያሲ ላሚቶንታ ባ ቆፋ ሂዶታ ቃላ ላታናይታሰ ቆንጨሳና ማላ ኮይዳ ጊሽ ጫቆ ቃላን ሚንሊዴሰ። 18 ያሲ አይ ዋዴካ ዋርዶታናሰ ዳንዳዬና፤ ኢዚ ላሚቶንታ ናሞፀ ሚሻታን ኑ ሲንላን ዲዛ ሂዶታ ኦይካናሰ ኢዛኮ ሽቂዳ ኑኒ ጌታ ሚኖቴላ ዴማና ማላ ኦላዴሰ። 19 ኑካ ሹምፖ ቴቄ ጊዲዳ ሚኖኔ አማንሊዛ ሂዶታ ዴሚዶሰ፤ ሄ ሂዶታይካ ማጋላሻዛፕ ጉዬ ባጋራ ዲዛ ጌዴ ያሳ ኬላ ጊዶ ጌሌሰ። ** 20 ሄ ሶዚካ ኑ ጊሽ ዬሱሲ ካሴቲ ጌሊዳ ሶ፤ ኢዚካ ማልኬፀዴቄ ሹሜቴላ ማላ ሚርናሰ ቄሴታ ሃላቃ ጊዲዴሰ።

* 6:8 ሜዴ 3:17-18 * 6:13-14 ሜዴ 22:16-17 * 6:19 ማጋላሻ ጊዛይሳ ኢሲ ኢሲ ባጋ ጋሞሉን ቃላን ማጋራጃ ጌቴሰ። * 6:19 ለቄ 16:2

7

ቄሴታ ሃላቃ ማልኬዴቄ

1 ሄሲ ማልኬዴቄይ ሳሌሜ ካዎን ያሳ ቄሴ፤ እዚካ ኣብራሃሜይ ካዎታ ኦሊ ያኒዲ ሲሚሽን ደሚዲ ኣብራሃሜ ኣንጂዴሰ። 2 ኣብራሃሜይካ ባሰ ዲዛ ኡባፌ ታሙ ኩሼፔ ኢሲ ኩሼ እዛሰ እሚዴሰ። ኮይሮ እዛ ሱንላሰ ቢርሼሊ “ዲሎ ካዎ” ጉሳ። ካሊዲ ቃሴ “ሳሌሜ ካዎ” ጉሲ “ሳርቴላ ካዎ” ጉሳ። 3 እዛሰ ኣያካ፣ ኣዎይካ ዎይኮ እዛ ዩሌቴላሰ ዛርኬይካ ባዎ። እዚ ኣይዴ ዩሌቴዲ ኣይዴ ሃይቁዳኮን ኤሬቴቤና፤ እዛሰ ደሜሊኔ ዉርሴሊ ባዎ፤ ጊዶ ኣቲን ያሳ ና ማላ ሜርናሰ እዚ ቄሴ ጊዲዲ ዴሰ።

4 ኣኔ እንቴ እዚ ኣይ ማላ ጊታኮኔ ቆፒቴ። ሃራይ ኣቶሺን ኣዎታሰ ኡባሰ ኮይሮይ ኣብራሃሜይ ባ ዲዲ ኤኪዳይሳ ኡባፌ ታማፌ እሳ ኬሲ እሚዴሰ። 5 ኢሰታሰ ቄሴቴሊ እሚቴዳ ለዌ ናይቴ ኢሰታ እሻቴ ኣብራሃሜ ዜሬላታ ጊዲኮካ ዴራፔ ሄሲካ ባ እሻታፔ ታማፌ እሳ ኤካና ማላ ኢሰታሰ ዎጋን ኣዛዜቴዴሰ። * 6 ሃይሳ ሃ ኣዴዛ ዜሬሊ ለዌ ዜሬላ ጊዴና። ጊዶ ኣቲን እዚ ኣብራሃሜፔ ታማፌ እሳ ኤኪዴሰ። ካሴ እዛሰ ሂዶታ ቃላይ እሚቴዳ ኣብራሜ ኣንጂዴሰ። 7 ባይራይ ካሎ ኣንጂዛይሲ ዎጋ። 8 ኢሲ ባጋራ ታማፌ እሳ ኤኪዛይቴ ሃይቁዛይታ። ሃራ ባጋራ ቃሴ ታማፌ እሳ ኤኪዛይይ ሃይቆንታ ፓፃ ዲዛ ማላ እዛሰ ማርካቴዳይይ ማልኬዴቄ። 9 ሃራይ ኣቶሺን ለዌይካ ኣብራሃሜ ባጋራ ታማፌ እሳ ኬሲዴሰ ጋናሰ ዳንዳይቴሰ። 10 ጋሶይካ ማልኬዴቄይ ኣብራሃሜ ጋጊዛ ዎዴ ለዌይ ቡሮ ባ ኣዎ ኣብራሃሜፔ ዩሌቴቤና።

ዩሱሲ ማልኬዴቄ ማላ

11 ፓጩይ ባይንዳ ፖሎይ ቤቴዳይኔ ዎጋይ ዴሬዛሰ እሚቴዳይ ለዌ ቄሴቴላ ማላ ጊዲዳኮ ኣሮኔ ማላ ጊዶንታ ማልኬዴቄ ሹሚቴላ ማላይ ሃራ ቄሴይ ያናሰ ኣዛሰ ኮሺዴ? 12 ቄሴቴላ ዛርኬይ ላሚቴዛ ዎዴ ዎጋይካ ላሚታናይሲ ኣቶንታ ሚሻ። 13 ሄሲ ዉሪካ እዛሰ ዮቴቴዳ ቄሴይ እዚ ሃራ ዜሬላ። እዛ ዜሬላፌ ኦኒካ ያርሾሶን ኦሊ ኤሪዛይይ ባዎ። 14 ኦ ጎዳይ ዩሁዳ ባጋፌ ዩዳይሲ ቴማ። ሙሴይ ቄሴታ ጊሽ ዮቴሼ ሃ ዜሬላ ጊሽ ዮቴዳይሲ ኢሲ ሚሽካ ባዎ።

* 7:5 ታይ 18:21

15 ማልኬደዌ ማላይ ሃራ ቄሴይ ዳንዲኮ ኑ ካሴ የተዳ የጋይ ዳር ቆንጮ ገደና። 16 ኢዚ ቄሴ ገዲዳይ ቆንጋ ዳዎ ዋልቃን ኣትን ዜሬላፊ ዩዳ ዋጋፔ ገደና። 17 ኢዛሰ “ኔ ማልኬደዌ ሹሚቴላ ማላ ሜርናሰ ቄሴ” ገ ማርካቲዳሰ። * 18 ካሴ ኣዛዞይ ላፋኔ ጎንጎታይሳ ገዲዳ ገሽ ኣቲዳሰ። 19 ዋጋይ ኦናካ ጌሻናሰ ዳንዳዮንጎ ገሽ ኑ ያሳ ኣቲ ሺቃናሰ ኢዛፔ ኣጂዛ ሃራ ሂደታይ ኑስ ኢሚቲዳሰ።

20 ሄሲካ ጫቆይ ባይንዳ ሃንቤና፤ ሃንኮ ቄሴ ገዲዳይቲ ጫቆይ ባይንዳይታ። 21 ኢዚ ገዲኮ ቄሴቴላ ጫቆን ኤኪዳሰ። ጋሶይካ ያሰ ኢዛ ገሽ “ጎዳይ ጫቁዳሰ፤

ባ ቆፋ ኢዚ ላሚና፤ “ኔ ሜርናሰ ቄሴ” ገደሰ። *

22 ሄሳ ማላ ጫቆፔ ዳንዲዳይሳን ዩሱሲ ሄሳፊ ኣጂዛ ጫቆ ቃላሰ ዋሴ ገዲዳሰ።

23 ካሴ ቄሴቲ ባ ኦሶን ሲንጤ ጉጅንጎ ማላ ሃይቆይ ኢሰታ ዲገዳ ገሽ ቆዳይ ኢሰታሰ ዳር። 24 ዩሱሲ ገዲኮ ሜርናሰ ዲዛይ ገዲዳ ገሽ ኢዛ ቄሴቴላ ሻሬቶንጎ ቄሴቴላ። 25 ሄሳ ገሽ ኢዚ ኢሰታ ገረሳና ጋናቲሼ ኡባ ዋዴ ሃይቆንጎ ፓፃ ኤቂ ዲዛ ገሽ ኢዛ ባጋራ ያሳኮ ዩዛይታ ወርሲ ኣሻናሰ ዳንዳዩሰ። 26 ሄሳ ገሽ ኑስ ኮሺዛ ቄሴታ ሃላቃይ ሄሳ ማላ ጌሺኔ ዋሶይ ኢዛ ቦላ ባይንዳ ያሎኔ ናጋራንቻታፔ ሻኬቴዲ ሳሎታፔ ቦላራ ቦንቹቲዳ ቄሴታ ሃላቃ። 27 ኢዚ ሃንኮ ቄሴታ ሃላቃታ ማላ ኮይሮ ባ ናጋራ ገሽ ቃሴካ ካሌሊዲ ሃንኮ ዴሬዛ ናጋራ ገሽ ጋላሰ ጋላሰ ያርሾ ሺሻናሰ ኢዛ ኮሺና። ኢዚ ባና ኣሌ ኢሚዳ ዋዴ ኣሳ ናጋራ ገሽ ኢሰቶ ሲንላ ባጋሳራ ያርሾ ወርሲ ፖሊዳሰ። * 28 ዋጋይ ዳቡራንቻ ኣሳታ ቄሴታሰ ዋና ሃላቃ ሂሰቲ ሹሚሰ። ዋጋፔ ካሊዲ ዩዳ ጫቆ ቃላይ ገዲኮ ሜርናሰ ኢዛ ቦላ ዋሶይ ባይንዳ ናዛ ሹሚዳሰ።

8

ዩሱሲ ኦራላ ጫቆ ቄሴታ ሃላቃ

1 ሄሳ ገሽ ኑ ሃራ ኦላና ዋና የጋይ ሃይሳ። ሃይሳ ማላ ሳሎ ቦላ ያሳ ቦንቹ ኣልጋ ኡሻቻን ኡቲዳ ቄሴታ ሃላቃይ ኑስ ዳሰ።

* 7:17 ማዛ 110:4 * 7:21 ማዛ 110:4 * 7:27 ሉዌ 9:7

* 2 ኢዚ አሲ ቶኪዳ ዲንካኔ ጊዶን ኦሊዛዴ ጊዶንታ ጎዳ ያሲ ቶኪዳ ቱሙ ዲንካኔን ገሻሶን ኦሊዛዴ።

3 ቁሴታ ሃላቃይ ሹሜተዛይ አሳይ ያሳሰ አሚዛይሳ ያሳሰ ሺሻናሲኔ ያርሾ ያርሻናሳ። ሄሳ ገሽ ሃይሲ ሃ ቁሴታ ሃላቃይካ ያሳሰ ሺሻናሰ አሲ ሺሺዛ ሚሺ ኢዛሰ ኮሼሰ። 4 ኢዚ ቢታ ቦላ ዲዛኮ ቁሴ ጊዴና። አዛሰ ጊኮ ዋጋይ ጊዛ ማላ ያርሾ ሺሺዛ ሃራ ቁሴቲ ዴቲሰ። 5 ኢሰቲ ካሴ ሳሎን ዲዛ ያሳ ኬላይሰ ለሚሶኔ ኤሾ። ሙሴይ ዲንካኔዛ ኦላና ገሺን “ኔሰ ዙማ ቦላ ቆንጨዳይሳላ ዉርሳ አላናሰ ናጌታ” ጊዛ አዛዘይ ሄሳ ገሽ ኢዛሰ አሚቲዴሰ። 6 ጊዶ አቲን ዩሱሲ ጊዶ ጌሊ ጋናቲዛይ ጫቆ ቃላይ ካሴይሳፌ አጂዛይሳ ማላ ኢዚ ኤኪዳ ኦሶይካ ካሴይታ ኦሶፕ አጂሰ። ሄሲካ ካሴይሳፌ ሎዒዛ ሂዶታ ቃላና።

7 ካሴ ጫቆ ቃላን ፓጩይ ባይንዳኮ ናምዓንሉ ሃራ ጫቃናሰ ኮሼና። 8 ጊዶ አቲን ያሲ ዴሬዛ ቦላ ፓጩይ ዲዛይሳ ዴሚዳ ገሽ “ኢሰራዔሌ አሳራኔ ዩሁዳ አሳራ ታኒ ኦራላ ጫቆ ጫቁታና ዋዴይ ያና። * 9 ሄሲካ ታ ኢሰታ ጊብፀፕ ኬሳናሰ ኢሰታ ኩሼ ኦይካዳ ካሴ ኢሰታ አዋታራ ጫቁቲዳ ቃላ ማላ ጊዴና። ጋሶይካ ኢሰቲ ካሴ ታ ጫቆ ቃላን ኤቁቤቲና። ታካ ኢሰታ ዩዳ ቤሳዲሰ።

10 ሄሳፌ ጉዬ
ኢሰራዔሌ አሳራ ታ ጫቁታና ቃላይ ሃይሳ ማላ ጌሰ ጎዳይ።
ታኒ ታ ዋጋ ኢሰታ ዋዘናን ዋላና።
ኢሰታ ዋዘና ቦላካ ፃፋና።
ታ ኢሰታ ያሴ ጊዴና።
ኢሰቲካ ታ ዴሬ ጊዴና።

11 ሃይሳፌ ጉዬ አሲ ባ ጉታ አሳ ዋይኮ
ባ አሻ ኔ ጎዳ ኤራ፣ ጊ ታማርሴና።
ጋሶይካ አሲ ጉላፌ ጊታታ ጋካናሰ
ዉሪካ ታና ኤራና።

12 ኢሰታ ቆሆዛ ታ ማራና።
ሃይሳፌ ሲንላን ታ አሳ ናጋራ ናምዓንሉ ዛራ ቆፕኬ” ጌሰ።

13 ሃይሳ ሃ ጫቆዛ ኢዚ “ኦራላ ጫቆ” ጊዲ ካሴ ጫቆዛ ጋልዓ ኬሲዴሰ። ሄሳ ገሽ ጋልዒዲ ዉሪዳይሲ ጳያና ዋዴይ ማቲዴሰ።

* 8:1 ማዛ 110:1 * 8:8 ኤር 31:31-34

9

ቢታ ቦላኔ ሳሎን ዲዛ ጎይኖ ዎጋ

1 ኮይሮ ጫቆ ቃላዛን ያሳሰ ጎይኒዛ ዎጋይኔ ቢታ ቦላ ዲዛ ያሳ ኬሌ ዳሰ። 2 ካሴ ናምዑ ከፊሌራ ዲዛ ዲንካኔይ ገብቲ ዳሰ። ኮይሮ ከፊሌዛን ያምፔ ዎሊዛሶይኔ ፃራጳዛይ ቃሴ ኡኬሌ ዳሰ። ሄሳ ሄ ከፊሌዚ ዲማ ከፊሌ ጌቲቲሰ። * 3 ናምዓንሶ ከፊሌዚ ናምዓንሶ ማጋላሻፔ ጉዬ ባጋራ ዲዛ ከፊሌይ ኡባፊ ዲማ ጌቲቲሰ። * 4 ሄሳ ጊደን ዎርቃፊ ኦሴቲዳ ኤፃኔ ጩዋሲዛ ቄሪ ሸልዔ ማላይኔ ዎርቃን ሚሹቲዳ ጫቆ ታቦታይ ዳሰ። ሄ ታቦታይካ ኢዛ ጊደን ማናይ ዲዛ ዎርቃ ለማቲይ፣ ጨሊሊዳ ኣርኔ ጉፊይኔ ጫቆ ቃላቲ ኢዛ ቦላ ፃፊቲዳ ሹቻ ማሴሌ ዳሰ። * 5 ሄ ታቦታዛ ቦላ ዲዛ ናጋራፔ ማሮቱላ ካማዛ ቦላ ባ ቁፊራ ካሚዛ ቦንቾ ኩሩቤቲ ዳቲሰ። ሃዒ ቃሴ ኑ ሄይታንታ ኢሳ ኢሳ ገሽ ሻኪ ሻኪ ሃሳያናሰ ዳንዳዮኮ። *

6 ወሪካ ሄሳሶ ገብቲዳፔ ጉዬ ቁሴቲ ባ ኦሶ ፖላናሰ ዳንካናሰ ኮይሮ ከፊሌ ጌሌቲሰ። * 7 ጊዲኮካ ኡባፊ ጊደቲዛ ከፊሌ ቁሴታ ሃላቃይ ፃላላ ጌሌሰ። ሄሲካ ላይላን ኢሲቶ ፃላላ ጊዲሺን ኢዚ ባ ናጋራ ገሺኔ ዳፊይ ኤሮንታ ኦሊዳ ናጋራ ገሽ ሸሺዛ ያርሾ ሱሉ ኦይኮንታ ሙሉካ ጌሌና። * 8 ኮይሮ ዲንካኔዚ ካሴ ዲዛ ዎዴ ጌዴ ኡባፊ ዲማ ጌቲቲዛሶ ኤፊዛ ኦጌይ ሄ ዎዴ ቆንጩ ጊደንታይሳ ፃሎ ኣያናይ ቤሴሰ። 9 ሄሲካ ሃይሳ ሃ ዎዴዛሰ ለሚሶ ጊዲሺን ካሴ ሸቁዛ ያርሾቲኔ ጮ ኢሜቲዛ ኢሞታቲ ኢሚዛይታ ዎዝና ሸምፒሳናሲኔ ሙሉ ጌሻናሰ ዳንዳይቤቲና። 10 ሄይታንቲ ወሪካ ኦራላ ዎጋይ ያና ጋካናሰ ጮ ሚላ ዲና ሃሳያ ማላ። ቃሴካ ኢሰቲ ሙሳ ገሺኔ ኡሻ ገሽ ቃሴካ ዲማ ዲማ ጌሾ ዎጋታ ፃላላ።

ከርሰቶሳ ሱሉ

11 ጊዲኮካ ከርሰቶሲ ቡሮፔ ያናሰ ዲዛ ሎዎ ሚሻታሰ ቁሴታ ሃላቃ ጊዲዲ ቆንጩዳሰ፤ ኢዚ ኢዛን ጌሊዳ ዲንካኔዚ ጊታኔ ጌሻ። ሄ ዲንካኔዚ ኣሳ ኩሼን ኦሴቶንታይሳኔ ሃይሳ ሃ ሚጴቴላፊ ጊዳና። 12 ኢዚ ሄ ዲንካኔዛን ጌሊሼ ዳይሻታ ሱሉኔ ዎፓኖ ቦራታ ሱሉ ኤኪ ጌሊቤና። ጊደ ኣቲን ኣሰ ኣሻናሰ ሚርናሰ ባ

* 9:2 ኬሳ 25:31-40፤ 26:1-30 * 9:3 ኬሳ 26:31-33 * 9:4 ኬሳ 16:33፤ 25:10-16፤ 30:1-6፤ ታይ 17:8-10፤ ዛሬ 10:3-5 * 9:5 ኬሳ 25:18-22 * 9:6 ታይ 18:2-6 * 9:7 ለዌ 16:2-34

ሱሉ ኤኪዲ ኡባሬ ዲማ ጌቴተዛ ኪፊሌ ሃራ ዋዴ ናምዓንሉ ጌሎንታ ማላ ወርሴላ ጌሎ ጌሊዴስ። 13 ኢስታስ ካሬ ባጋ ኣሳቴላይ ቱኒዳ ኣሳታ ቦላ ኣራጨዛ ዴይሻ ሱሉኔ ዋፓኖ ቦራታ ሱሉ ሂሳላካ ያርሾስ ፀጌቴዳ ኡሳ ቢዲንሉ ኢስታ ጌሺዛይሳ ጌዲኮ። * 14 ሜርና ኣያናን ባና ዋሶይ ባይንዳ ያርሾ ኦሊ ያሳስ ሺሺዳ ኪርሰቶሳ ሱሉ ኮኒ ዴዎ ያሳስ ጎይናናስ ሃይቁላ ኦሶፔ ኑና ኣይ ማላ ኣሉ ጌሻንዴ?

15 ሃሳ ጊሽ ጃይጌቴዳይቲ ኢስታስ ኢማና ጌቴተዳ ሜርና ላታ ኤካና ማላ ኪርሰቶሲ ኦራላ ጫቆስ ጋናተዛይ ጌዲዴስ። ኮይሮ ጫቆዛ ጋርሳን ዲዛ ዋዴ ኢስቲ ኦሊዳ ናጋራፔ ጌያና ማላ ኢስታ ጊሽ ኢዚ ሃይቁዴስ።

16 ባዛይ ባዘቴዛይሳ ጌዲኮ ባዚዳይ ሃይቆ ሻኪ ኤራናስ ቤሴስ። 17 ጋሶይካ ባዛይ ሚኒዛይ ባዚዳይ ሃይቁና። ባዚዳይይ ፓፃ ዲሺን ባዛይ ኣይኮካ ኣሌና።

18 ሃሳ ጊሽ ኮይሮ ጫቆ ቃላይ ሱሉ ባይንዳ ሚኒቤና። 19 ሙሴይ ባ ኣዛዞ ዋጋ ዴራስ ዮቲ ሲሚዲ ዴይሻታ ሱሉኔ ዋፓኖ ቦራታ ሱሉ ሃላራ ኤኪዲ ዞዎ ደርሳ ኢሲኬን ኤጩሬ ወርጩ ማላ ሂሶጴ ጌቴተዛ ሚላራ ኤኪዲ ባ ፃፊዳ ዋጋ ማፃፋ ቦላኒኔ ዴሬዛ ቦላ ወፂዴስ። 20 “ኢንቴ ናጋና ማላ ኢንቴና ያሲ ኣዛዚዳ ጫቆ ቃላ ሱላይ ሃይሳ” ጌዴስ። 21 ሃሳላካ ዲንካኔዛኔ ኢዛ ጊደን ዲዛ ኦሶ ሚሻ ቦላ ኡባ ሱሉ ወፂዴስ። * 22 ኣዳሬካ ጉላ ሚሻቲ ኣቲሺን ሃንኮ ዳሮ ሚሻይ ሱላን ጌያናስ ቤሲዛይሳ ዋጋይ ኣዛዜስ። ሱሉ ጉኮንታ ዲሺን ማሮይ ባዋ። *

23 ሃሳ ጊሽ ሳሎ ሚሻታስ ሌሚሶ ጌዲዳይቲ ሃይታንታን ጌያናይስ ኣቴና ሺን። ሳሎን ዲዛ ሚሻቲ ጌዲኮ ሃይሳሬካ ኣጴዛ ያርሾን ጌያናስ ቤሴስ። 24 ኪርሰቶሲ ቱሙ ዲንካኔይስ ሌሚሶኔ ኣሳ ኩሺን ኦሴቲዳ ያሳ ኬሌ ጌሊቤና፤ ጊደ ኣቲን ሃዒ ኑ ጊሽ ያሳ ሲንላን ቤታናስ ፑዴ ሳሎ ጌሊዴስ። 25 ቁሴታ ሃላቃይ ባ ሱሉ ጊደንታ ሱሉ ኤኪዲ ላይላን ላይላን ኡባሬ ዲማ ኪፊሌ ጌሊዛይሳላ ኪርሰቶሲ ባና ያርሻናስ ፑዴ ሳሎ ሺሬቲ ሺሬቲ ጌሊቤና። 26 ሃሳ ማላ ጌዲዛኮ ኪርሰቶሲ ኣላሜይ ሚጴቶሳፔ ሃ ሲሚን ዳሮ ዋዴ ሜቶ ኤካናስ ቤሴስ፤ ሃዒ ቃሴ ዋዴ ወርሴላን ባና ያርሺዲ ናጋራ ዲጋናስ ወርሴላስ ኢሲቶ ቆንጨዴስ።

* 9:13 ለዌ 16:15-16፤ ታይ 19:9፤17-19 * 9:21 ለዌ 8:15 * 9:22 ለዌ 17:11

27 ሄሳዳካ አሲ ኢሲቶ ሃይቁስ፤ ሄሳፌ ካሊዲ ፐርዳ ሲንላን ኤቃናሰ ገጊ ኡቲዳስ። 28 ኪርሰቶሲ ዳሮ አሳ ናጋራ ዲጋናሰ ኢሲቶ ያርሼቲዳስ። ናምዓንሶካ ኢዚ ቆንጫና፤ ሄሲ ኢዛ ናገዛይታሰ አቶቴላ ኤኪ ያናሰ አቲን ናምዓንሶ ዛሪ ናጋራ ቶካናሰ ገዴና። *

10

ኪርሰቶሲ ኢሲቶ ሜርናሰ ሺሺዳ ያርሾ

1 ሙሴ ዎጋይ ቡሮ ሲንላራ ያና ሎዎ ሃናታሰ ኤሾፔ አቲን ቱሙ አዳ ሜቋይ ኢዛሰ ዳና። ሄሳ ገሽ ላይላን ላይላን ፓጩይ ባይንዳ ሺሪ ሺሪ ሺሺዛ ያርሾይ ሶሴ ጎይናናሰ ሸቂዛ አሳ ጌሻናሰ ሙሊካ ዳንዳይቤና። 2 አሳ ሙሌራ ጌሻና ዳንዳይዛይሳ ገዲዳኮ ኢሰቲ ያርሾ ያርሻናይሳ አጋጌቲኔ? ቃሴካ ሶሴ ጎይናና ሸቂዛ አሳይ ኢሲቶ ጌዪዛኮ ባ ዎዝናራ ናጋራንቻ ገዲዳይሳ ሲቆና። 3 ገዶ አቲን ሃይቲ ያርሾቲ ላይላን ላይላን ናጋራ ዛሪ ዛሪ ቆፊሴቲስ። 4 ጋሶይካ ዎፓኖታኔ ዳይሻታ ሱሊ አሳፔ ናጋራ ዲጋናሰ ዳንዳይና።

5 ሄሳ ገሽ ኪርሰቶሲ ሃይሳ ሃ አላሜዛ ዪዲ
“ኔኒ አሞታኔ ያርሾ ኮያቤይካ ሺን
ኔ ታሰ አሾ ገረሳዳሳ። *

6 ታማን ፀጌቲዛ ያርሾኔ
ናጋራ ገሽ ሸቂዛ ያርሾን
ኡፋይታቤይካ” ገዴሰ።

7 ሄ ዎዳ ታኒ
“ታ ገሽ ጌሻ ማፃፋን ፃፊቲዳ ማላ
‘ዎሶ ሄኮ ታኒ ኔ ሼኔ ኦላናሰ ያዲሰ’ ጋዲሰ”
ገዴሰ። 8 ሙሴ ዎጋይ ሄሲ ሄሳሶ ሃናና ማላ አዛዚኮካ ኢዚ ቃሴ ኮይሮ “ያርሾ፣ አሞታ፣ ፀጌቲዛ ያርሾኔ ናጋራ ገሽ ሸቂዛ ያርሾ ኔ ኮያቤይካኔ ኢዛን ኡፋይታቤይካ” ጌሰ። 9 ካሌሊዳካ “ሄኮ ታ ኔ ሼኔ ኦላና ያዲሰ” ገዴሰ። ናምዓንሶካ ኤሳናሰ ኮይሮይሳ ዲገዴሰ። 10 ሃይሳ ሃ “ኢዛ ሼኔ” ገዛ ቃላ ማላ ሃራ ያርሾ ዛሬላ ሸሻናሰ ኮሾንታ ማላ ዬሱስ ኪርሰቶሳ ባጋራ ኢሲቶ ሸቂዳ ያርሾን ጌዪደሰ።

* 9:28 እሳ 53:12 * 10:5 ማዛ 40:6-8

11 ቄሴይ ሃች ሃች ኤቁዲ ባ ኦሶ ፖሌስ። እስ ናጋራፔ ጌሻናስ ዳንዳዮንታያታ ዋንቲን ዋንቲን ሺሺስ። * 12 ኪርስቶሲ ጊዲኮ ያርሾ ኢሲቶ ሜርናስ ጊዳናይሳ ሺሺዲ ኣዋ ኡሻቻን ኡተዳስ። 13 ሄ ጋላሳፌ ሲሚን ኢዛ ሞርኬቲ ኢዛ ቶሆ ጋርሳን ዩዴታና ጋካናስ ናጎን ዳስ። 14 ጋሶይካ ኢሲቶ ሺሺዲ ያርሾን ጌያና ኣሳታ ሜርናስ ጌሺዳስ።

15 ሄሳ ሄ ሃሮዛ ገሽ ዓሎ ኣያናይካ ኑስ ማርካቴስ። ኮይር፣

16 “ሄሳፌ ጉዬ ታ ኢስታራ ጌላና ጫቆ ቃላይ ሃይሳ።

ታ ዋጋ ታ ኢስታ ዋዝናን ዋላና።

ኢስታ ዋዝናን ታ ፃፋና”

ጌስ ጎዳይ። * 17 ቃሴካ “ታ ኢስታ ናጋራጌ ማካላ ናምዓንጻ

ቆፒኬ” ጌስ ጎዳይ። *

18 ሄይታንቲ ዉሪካ ኣቶ ጌቲቲዳፔ ጉዬ ናምዓንጻ ናጋራስ ሺቃና ሃራ ያርሾይ ዳና።

ዉርሴል ጋካናስ ሚኒ ዳና ማላ ሺቁዳ ዪይስ

19 ሄሳ ገሽ ታ ኢሻቶ፤ ኑኒ ዩሱስ ኪርስቶሳ ሱፋ ባጋራ ጌዴ

ኡባፌ ዲማ ጌሽ ጌቲቲዛሶዮ ጌላናስ ፃላቴል ዳሚደስ። 20 ሄሲካ

ማጋላሻ ባጋራ፤ ሄሲካ ኢዚ ባ ኣሾ ባጋራ ኑስ ዶዩዳ ኦራሴጌ

ዴዎ ጊዲዳ ኦጌና። 21 ያሳ ኬፋ ቦላ ሹሚቲዳ ቄሴታ ሃላቃይ ኑስ

ዲዛ ገሽ፣ 22 ኑኒ ኑ ኢታ ቆፋፔ ጌያናስ ኑ ዋዝና ኣራጩቲዲ ኑ

ኣሳቴላካ ዓሎ ሃላን ሚጩቲዲ ቱሙ ዋዝናፔጌ ኩሚጻ ኣማኖን

ያሳኮ ኣጌ ሺቆስ። * 23 ኑስ ሂደታ ቃላ ኢሚዳዴይ ኣማኔቲዛዴ

ጊዲዳ ገሽ ኑኒ ኣማኒዲ ኢዛ ገሽ ማርካቲዛ ሂደታፔ ሄ ሃ ጎንታ

ኣጌ ሎዔላ ኦይኮስ። 24 ሲቆኒጌ ሎዎ ኦሶን ኑ ሚኒ ዳና ማላ ኣጌ

ኢሶይ ኢሳ ቆፊሶስ። 25 ኣጌ ኑ ኡባ ጋላስ ኢሶይ ኢሳራ ጋኪ ጋኪ

ኢሶይ ኢሳ ሚንጭሶስ ኣቲን ኢሲ ኢሲ ኣሳቲ ሺቆ ኣጊዳ ማላ

ኣጌ ኑኒ ሺቆዛ ኣጎኮ፤ ሃራፔካ ጎዳ ዩሱሲ ማታቲዳይሳ ቆፒሼ

ካሴፔ ሚኒ ሺቁቲ።

26 ኑኒ ቱማ ሻኪ ኤሪዲ ኤኪዳይሳፌ ጉዬ ኤሪሽ ናጋራ ኦሊኮ

ሃይሳፌ ጉዬ ናጋራስ ሺቃናስ ሃራ ያርሾይ ዳና። 27 ሃራ ቡሮ

ሃናናይ ዳሮ ባቢሲዛ ፒርዳይ ያሳ ሞርኬታ ፀጋና ናጊዛ ሚኖ

ታማይ ፃላላ ዳስ። * 28 ሙሴ ዋጋ ካዲዳ ኣሲ ናምዑ ዋይኮ

* 10:11 ኩሳ 29:38 * 10:16 ኤር 31:33 * 10:17 ኤር 31:34
* 10:22 ለዌ 8:30፤ ሃዚ 36:25 * 10:27 ኢሳ 26:11

ሄዡ ማርካቲ ማርካቲኮ ማርይ ባይንዳ ሃይቆን ቃፃዬቴስ። *
 29 ሂሰቲን ያሳ ና ካጲዳ ኣሲ ኢዛን ገዪዳ ጫቆ ሱፋ ሂራይሶ ሚሻ ማላ ቆዲዳዴሲኔ ኢዛ ኪያቴፋ ኣያና ኢሴሌዳዴሶ ኣይ ማላ ሄሳፌ ኣጲዛ ፐርዳይ ኢዛሰ ቤሲዛ ኢንቴስ ሚሳቲዜ? *
 30 ታኒ ኢዛሰ ሃሎ ኬሳና፤ ኢዛዴ ኦሶ ማላ ኢዛዴሰ ታ ዛራና” ጊዳይሳ ኑ ኤርሰ። ቃሴካ “ኅዳይ ባ ዴሬዛ ቦላ ፐርዳና” ጌሰ ኅዳይ። * 31 ዴፆ ያሳ ኩሼን ኩንዴሌ ዳሮ ባቢሴስ።
 32 ኢንቴስ ኢሲቶ ፖፆይ ፖሲዳፔ ጉዬ ሜቶ ዋዴ ዳሮ ባፃን ኢንቴ ካሴ ሚኒ ኤቁዳ ቤኒ ዋዴዛ ዩሺ ቆፒቴ። 33 ኢሲ ኢሲ ዋዴ ኢንቴ ዲላታ ዴሬ ሲንፋን ጫሻሲኔ ኅዴቴፋሰ ኣጲ ኢሜቲዴታ። ቃሴ ሃራ ዋዴካ ሄሳ ማላ ዋዬይ ኢስታ ቦላ ጋኪዳ ኣሳታራ ኢንቴካ ኢሲፌ ዋዬ ቤይዴታ። 34 ኢንቴ ኢንቴስ ሃራፔ ኣጲዛ ሜርናሰ ዳና ሃሮይ ዲዛይሳ ኤሪዛ ጊሽ ቃሼቲዳይታስ ሚሼቲዴታኔ ኢንቴ ሃሮይ ቦንቁቲሺን ኡፋይሳን ዳንዳይዴታ።
 35 ሄሳ ጊሽ ጊታ ዋጋይ ዲዛ ካሴ ኢንቴ ኣማኔቴፋ ኣኅፍቴ።
 36 ኢንቴ ያሳ ሼኔ ፖሊዲ ኢዚ ኢንቴስ ኢሚዳ ኡፋይሳ ቃላ ኤካናሰ ሚኒ ኤቃናሰ ኢንቴና ኮሼስ። 37 ጋሶይካ ጉፋ ዋዴፔ ካሊዲ “ያናይሲ ኢዚ ያና፤ ጋምዔና” 38 ፃሎ ኣሲ ጊዲኮ ኣማኖን ዴፆ ዴማና፤ ጉዬ ኡንዱዲዛይይ ዲኮ ታ ሽምፖያ ኢዛዴ ቦላ ኡፋዬቴኩ።
 39 “ኑኒ ጊዲኮ ኣማኒዲ ኣቲዳይታ ባጋ ኣቲን ጌዴ ጉዬ ኡንዱዲ ጳዪዛይታ ባጋ ጊደኮ” ጊዴሰ።

11

ኣማኖ

1 ኣማኖ ጌሌ ኢሲ ሚሼ ሃናና ጊዲ ኑ ሲጵንታ ዲሼ ቤዮንታ ሚሼካ ቤዱዳ ማላ ኤር ጊ ኤኮ። 2 ካሴ ኣዋቲ ጋላቲቲዳይ ሄሳ ማላ ኣማኖና።
 3 ሃይሲ ሃ ኣላሚይ ያሳ ቃላን ሜጴቲዳይሳ ኑ ኣማኖን ኤርሰ። ሄሳሶካ ኣይፌን ቤቲዛይሲ ሜጴቲዳይ ቤቲዛ ሚሻፌ ጊደንታይሳ ኑኒ ኤርሰ። *
 4 ኣቤሌይ ያሳሰ ቃዬሌ ያርሾፌ ኣጲዛ ያርሾ ኣማኖን ሺሺዴሰ። ያሲ ኢዛ ያርሾዛ ጊሽ ሃሳዪሼ ኢዚ ኣማኖን ጌሽ ጊዲዳይሳ

* 10:28 ዛሬ 17:5-7፤ 19:15 * 10:29 ኬሳ 24:8 * 10:30 ዛሬ 32:35-36 * 11:3 ሜጴ 1:1፤ ማዛ 33:6-9፤ ዮሃ 1:3

ማርካቲዳስ። ኢዚ ሃይቁንካ ኢዛ ኣማኖይ ሃዒ ጋካናሰ ሃሳዬቲስ።
*

5 ሄኖኬይ ሃይቆ ቤዮንታ ማላ ሃይሳ ኣላሜዛፔ ኣማኖን ኤኬቲዳስ። ያሲ ኢዛ ኤኪዳ ጊሽ ኢዚ ቤቲቤና፤ ኤኬታናፔ ካሴቲዳ ኢዚ ያሳ ኡፋይሲዳይሲ ዮቲቲዳ ጊሽ ኢዚ ኤኬቲዳስ።

* 6 ቃሴካ ኣማኖይ ባይንዳ ዲሺን ያሳ ኡፋይሳናሰ ሙሉካ ዳንዳዬቲና። ጋሶይካ ያሳኮ ሸቆዛዳይ ወሪካ ያሲ ጊዛይሳኔ ዋዘናፔ ኢዛ ኮዩዛይታስ ኢዚ ዋጋ ኣማናይሳ ኣማናናሰ ቤሴስ።

7 ኖሃሰ ያሲ ቡሮ ኖሃይ ባ ኣይፊን ቤዮንታ ሚሻ ጊሽ ናጌታና ማላ ዮቲን ኖሃይ ያሳ ባቢዲ ባሶ ኣሳ ኣሻናሰ ኣማኖን ማርካቤ ከዲዲ ኣላሜ ኣሳ ፐርዲሲዳስ፤ ኣማኖን ቤቲዛ ዲሎቲል ላቲዛዴ ጊዲዳስ። *

8 ኣብራሃሚይ ባሰ ላታ ቢታ ኤካናሰ ያይጌቲዳ ዋዴ ኣማኖን ኣዛዘቲዳስ። ኣዋ ቢዛኮኔ ኤሮንታ ኣጊኮካ ኤሮ ጊዲ ቢዳስ። *

9 ኣላጋ ቢታን ቤቲ ኣሳ ማላ ቡሮ ኔሰ ኣሜታና ጌቲቲዳ ቢታን ኣማኖን ኡቲዳስ። ኢዛሰ ኣሜቲዳ ሂዶታ ቃላ ኢዛራ ኢሲፊ ላታና ዪሳቃ ማላኔ ያቆቤ ማላ ዱንካኔን ደዒዳስ። * 10 ጋሶይካ ሚና ዲዛሮ ያሲ ኢዞ ቆፕ ሜዲዳ ካታማዮ ኤካና ናጊዳስ።

11 ኣብራሃሚስ ዋዴይ ጌዴ ቢዳዴ ጊዲኮካ ሳራይካ ዬሎንታ ማካራ ጊዲኮካ ሂዶታ ኢሰታስ ኣሚዳዴይ ኣማኔቲዳዴ ሂሰቲ ያሊዲ ኣማኖን ና ኣዋ ጊዳናሰ ጋኪዳስ። * 12 ሄሳ ጊሽ ሃይሳ ሃይቁዳ ኣሳ ማላ ቆዴቲዳ ኢሲ ኣብራሃሚፔ ሳሎ ያለንቲ ማላኔ ኣባ ኣጩ ማላ ቆዳይ ባይንዳ ዳሮ ዜሬላይ ቤቲዳስ። *

13 ሄይቲ ወሪካ ኢሰታስ ኣሜቲዳ ሂዶታ ቃላ ደሞንታ ባ ኣማኖን ናጊዳ ማላ ሃይቁዳ። ጊዲኮካ ኢሰቲ ሃይሳ ቢታ ቦላ ኣማጺኔ ቤቲ ኣሰ ጊዲዳይሳ ኤሪዳ ጊሽ ሃሆን ዲሹ ቤዩዲ ኩሹን ኣሊዳ ማላ ኡፋይሳን ኤኪዳ። * 14 ሄሳ ማላ ጊዛ ኣሳቲ ኢሰታ ዳሬይ ኣዋኮኔ ባ ዳሬ ናጊዛይሳ ቆንጩን ቤሴቲስ። 15 ኢሰቲ ባ ዬጊ ኬዚዳ ዳሬ ዛሪ ቆፕዛኮ ጉዬ ሲሚ ባና ዳንዳዬቲስ። 16 ሃዒ ሃሳፊ ኣዲዛ ፑዴ ሳሎን ዲዛ ዳሬ ላሞቲቲስ። ሄሳ ጊሽ ያሲ ኢሰታስ ሳሎን ካታማ ጊጊሲዳ ጊሽ “ኢሰታ ፃላ ያሳ” ጌቲቲ ያይጌታናሰ ዬላቲቤና።

* 11:4 ሜዴ 4:3-10 * 11:5 ሜዴ 5:21-24 * 11:7 ሜዴ 6:13-22
* 11:8 ሜዴ 12:1-5 * 11:9 ሜዴ 35:27 * 11:11 ሜዴ 18:11-14፤
21:2 * 11:12 ሜዴ 15:5፤ 22:17፤ 32:12 * 11:13 ሜዴ 23:4፤ 1ታር
29:15፤ ማዛ 39:12

17 ያሲ ኣብራሃሜይ ባ ናዛ ዪሳቃ ሹካና ማላ ፓጪን ኣብራሃሜይ ዪሳቃ ያርሻናሰ ኣማኖን ሺሺዳሰ። ያሲ ኢዛሰ ኢማና ጊዳይሳ ኢዚካ ባ ና ኢሲኔዛ ሹካናሰ ጊቤቲዳሰ። * 18 ሄሲካ ያሲ ኢዛሰ “ኔ ዜሬሊ ዪሳቃ ባጋራ ፃይጌታና” ጊዳይሳ ማላ። *

19 ያሲ ሃይቂዳዴ ዴንፋናሰ ዳንዳዪዳይሳ ኣብራሃሜይ ኣማኒዳ ጊሽ ዪሳቃካ ሃይቆፔ ዴንዲዳ ኣሳ ማላ ናምዓንፋ ዴሚዴሰ። 20 ዪሳቃይ ቡሮፔ ሃናናይሳ ቆፔ ኤኪዲ ያቆቤኔ ኤሳዌ ኣማኖን ኣንጂዳሰ።

21 ያቆቤይ ሃይቃና ጊሽ ዮሴፌ ናይታ ኢሳ ኢሳ ኣማኖን ኣንጂዳይኔ ባ ጉፌ ቦላ ዳርቲ ኤቂዲ ጎይኒዳይ ኣማኖና። *

22 ዮሴፌ ሃይቃና ጊሽ ኢሰራዔሌ ኣሳይ ጊብፃፔ ኬዛናይሳ ኢዚ ዮቲዳይኔ ባ ሜቄሳ ጊሽ ኢሰቲ ኣይ ኦፋናኮኔ ኢሰታ ኣዛዚዳይ ኣማኖና። *

23 ሙሴይ ዬሌቲን ኢዛሰ ማላይ ሎዎ ጊዲዳይሳ በዪዲ ኢዛ ዬሊዳይቲ ኢዛ ሄሹ ኣጊና ጋካናሰ ካዎዛ ኣዛዞ ባቦንታ ቆቲዳይ ኣማኖና። * 24 ሙሴይ ዲጪ ጋኪዲ “ፓርኔሰ ናይ ና” ጌቲታናይሳ ኣማኖን ኢዲዳሰ። * 25 ጉፋ ዎዴሰ ናጋራን ቤቲዛ ኡፋይሳፌ ኣሊዲ ያሳ ኣሳራ ሜቶ በያናሰ ዶሪዴሰ። 26 ጊብፃ ዴሬን ዲዛ ሃሮፔ ቦላራ ኪርሰቶሳ ጊሽ ዎዬ ኤኮይ ዳሮ ኣጂዛ ሃሮ ጊዲዳይሳ ዩሽ ቆፔዳሰ። ጋሶይካ ኢዚ ሲንፋፌ ኤካናይሳ ቡሮ ሃሆን በዪዳ ጊሻሳ።

27 ካዎ ሃንቆሰ ባቦንታ ኣማኖን ጊብፃ ዬጊ ኬዚዳሰ። ቡሮ በቶንታይሳ በዪዛ ማላ ቆፔዲ ሄ ቆፋን ሚኒ ኤቂዳሰ። 28 ባይራታ ዉርሲ ዎጂዛይሲ ኢሰራዔሌታ ባይራ ናይታ ዎጅንታ ማላ ኣማኖን ፓዚጋኔ ሱፋ ዉፃሳ ዎጋ ዎሊዳሰ። *

29 ኢሰራዔሌ ኣሳይ ማላ ቢታ ቦላ ሃሙቲዛ ማላ ዘዎ ኣባ ጊዶራ ኣማኖን ፒኒዳሰ። ጊብፃ ኣሳይ ቃሴ ኢሰታፋ ሃናና ጊሽ ኣባን ሚቲቲዳሰ። *

30 ኢሰራዔሌ ኣሳይ ኢያርኮ ጊምቤዛ ላፑን ቃማ ዩዩ ዩዩ ኣጂዳፔ ጉዬ ጊምቤዛ ኣማኖን ላሊዳሰ። * 31 ላይማን ኣቁዛ

* 11:17 ሜዴ 22:1-14 * 11:18 ሜዴ 21:12 * 11:21 ሜዴ 47:31፤ 48:1-20 * 11:22 ሜዴ 50:24፥25፤ ኬሳ 13:19 * 11:23 ኬሳ 2:2፤ 1:22 * 11:24 ኬሳ 2:10-12 * 11:28 ኬሳ 12:21-30 * 11:29 ኬሳ 14:21-31 * 11:30 ኢያ 6:12-21

ኤራዓባ ዴሬ ያሞሳና ዪዳይታ ሳርን ሞካ ኤኪዳ ጊሽ ሃንኮ አዛዜቶንታ አሳራ ቆዮንታ አማኖን አታዲስ። *

32 ሃይሳፌ አዴሰ ሃራ አይ ጋኔ? ጌዶኔ ጊሽ፣ ባራቄ ጊሽ፣ ሳሞሶኔ ጊሽ፣ ዮፊታሄ ጊሽ፣ ዳወቲ ጊሽ፣ ሳሜላ ጊሽ ቃሴ ናቤታ ጊሽ ታ ዮቶንታ ማላ ታሰ ዎዳይ ዴና። * 33 ሄይታንቲ አማኖን ካዎታ ያኒዳ፤ ሱሬ ፐርዳ ፐርዲዳ፤ ባሰ አሜቲዳ ሂዶታ ቃላ ኤኪዳ፤ ጋሞታ ዲና ሳርዲዳ፤ * 34 ታማ ዎልቃ ቶይሲዳ፤ ቃራ ማሻፌ ከሲ ኤኪ አቲዳ፤ ዳቡራፔ ሚኒዳ፤ ኦላሶን ሳባታ ጊዲዳ፤ አላጋ አሳ ኦላ ሳዲዳ፤ * 35 ማጫሳታሰ ሃይቁዳይቲ ፓዲዳ፤ ባጋይቲ ቃሴ ሄሳፌ አዲዛ ሃይቆፔ ዴንሲ ዴማናሰ ጊዲ ሃይቆፔ አቴሲ ለቁዲ ሃይቆሰ ባና አሲ አሚዳ፤ ዎፔፔ አታናሰ ኮይቤቴና።

* 36 ኢሲ ኢሲ አሳቲ አሳን ካዔቲዳ፤ ጋራፊቲዳ፤ ባጋይቲ ቃሴ ቃሽ ከሲ ጌሊዳ። * 37 ሹቻን ጫዴቲዳ፤ ማጋዜንካ ናሞቡ ከዚ ጳለቁቲዳ፤ ማሻን ሹኮቲ ሃይቁዳ፤ ዎፔቲሹ፣ ሳዴቲሹ ኣቡርሼ ዶርሳ አቴኔ ዴይሻ አቴ ማይዒዲ ዎፔቲዳ። * 38 ሃ አላሚይ ኢሰታሰ ቤሶንታይሳ ጊዲዳ ጊሽ ባዞኒኔ ጌዜን ሳንጎሎኒኔ ኦላ ጊዲን ዎፔቲዳ።

39 ሄይታንታ ኡባታ አማኖ ጊሽ ማርካቲኮካ ኢሰታፌ ኦኒካ አሜታና ጌቴቲዳ ሂዶታ ቃላ ጋኪዲ ኤኪዳዴይ ዴና። 40 ያሲ ኮሰ ሄሳፌ አዲዛዝ ጊጊሲዳ ጊሽ ኦ ባይንዳ ኢሰቲ ያላላ ኩሜሰ ጊዳና ዳንዳይቤቴና።

12

ያሲ ባ ናይታ ሴሬሰ

1 ሄሳ ጊሽ ሻራ ማላ ኦና ዩይ አዲዳ ዳር ማርካቲ ኮሰ ዲሺን ኦና ዴዲዛ ቶሆኔ ቃሴ ኦና ቃቺ ኦይኪዛ ናጋራ ዉርሲ ኦፔ ዎራ ዩጊዲ ኦ ሲንላን ዲዛ ዎሳ ጌንጫኒኔ ዳንዳያን አኔ ዎያሰ። 2 ኦ አማኒዛ አማኖዛሰ ኮይሮኔ ፖሎ ጊዲዳ ዩሱሳ አኔ ዪሎሰ። ኢዚ ባ ሲንላን ዲዛ ኡፋይሳ ጊሽ ማሰቃሌ ቦላ ሃይቆ ዳንዳዩዲ

* 11:31 ኢያ 2:1-21፤ 6:21-25 * 11:32 ዳና 6:11-8:32፤ 4:6-5:31፤ 13:2-16:31፤ 11:1-12:7፤ 1ሳሜ 16:1፤ 1ካዎ 2:11 * 11:33 ዳኔ 6:1-27 * 11:34 ዳኔ 3:21-30 * 11:35 1ካዎ 17:17-24፤ 2ካዎ 4:25-37 * 11:36 1ካዎ 22:26-27፤ 2ታር 18:25-26፤ ኤር 20:2፤ 37:15-16፤ 38:6 * 11:37 2ታር 24:21

ማሰቃሌ ቦላ ባና ጋካና ካወሻቴላ ሌቂዲ ያሳ አልጋሰ ኡሻቻን ኡቴዳሰ።

3 ሂሰቴኮ አንቴ ዳቡሪዲ ሂደታ ቃንጾንታ ማላ ሂሳሶካ ናጋራንቻታቴ ካሴ ኢዛ ቦላ ጋኪዳ ሂሳ ማላ ኤቄቴላ ዳንዳዬዳ ዬሱሳ ቆፒቴ። 4 ሱላ ጉካና ጋካናሰ ናጋራራ አንቴ ቡሮ ኤቄቴቤይኬታ። 5 አንቴ ያሳ ናይታ ጊዲ ኡቴዲ ቃላይ ጊዛይሳ ባሊዳታ። “ታ ናዞ ያሳ ሴራ ካወሻን ጭሎ፤ ኔና ኢዚ ሴሪዛ ዋዴ ሂደታ ቃንጾ። 6 ጋሶይካ ጎዳይ ባ ደሲዛዴ ሃንቄሰ፤ ኢዚ ባ ደሲዛዴ ሴሬሰ። ኢዚ ባ ና ማላ ጭሊዛዴ ቃፃዬሰ” ጊዳሰ።

7 ያሲ አንቴና ባ ና ማላ ቆዲዛ ጊሽ ሃንቆ ዳንዳዬቴ። አዋይ ሃንቆንታ ናይ ኦኔ? 8 ናይ ዉሪ ሴራን ዲጨዛሶ አንቴ ዲጮንታ አጊኮ አንቴ ካሬን ዬሌቴዳ ና ኣቴን ሶ ና ጊዳኬታ። 9 ሂሳ ኡባሬ ቦላራ ሃይሳ ቢታ ቦላ ኦና ሃንቄ ዲቺዳ አሾ አዋቲ ዳቴሰ። ኦካ ኢሰታ ቦንቸሰ። ሂሰቴን ዳጾን ዳያናሰ ኦሰ አያና አዋ ጊዲዳይሳሰ አዛሰ ሃሳሬ አላ አዛዜቶኮኒ? 10 ኦ አዋቲ ኦና ባሰ ሎጾ ሚሳቲ ቤቴዳ ማላ ጉላ ዋዴሰ ቃፃዬቴሰ። ያሲ ጊዲኮ ኦኒ ኢዛ ጌሻቴላ ኢዛፔ ዳማና ማላ ኦና ጎሳናሰ ቃፃዬሰ። 11 ቂፃቴይ ዉሪካ ሃሲሰ ኡፋይሶንታ ኢታ ሚሳቴሰ ሺን ጉዬፔ ቃሴ ደሲ ኤኪዳ አሳታሰ ሳርቴላ ኢዛን ኩሚዳ ጭሎቴላ አይፊን ጋላሰ።

12 ሂሳ ጊሽ ዳቡሪዳ አንቴ ቄሴኔ አንቴ ጉልባቴ ሚኒሲቴ። * 13 ዋቤይ ፓፃና ማላ ኣቴን ካሴፔ አላ ዋቦንታ ማላ አንቴ ቶሆሰ ሎጾ ኦጌ ጊሲሲቴ። *

ያሳሰ አዛዜቶንታዳሰ አሜቴዳ አዛዞ

14 አሲ ኡባራ ሳሮ ዳና ማላ አንቴሰ ዳንዳዬቴዛይሳ ዉርሲ አላቴ። ጌያና ማላ ኮዩቴ። ጌሻቴላ ባይንዳ ጎዳ ቤያናሰ ዳንዳዬቴና። 15 አንቴሬ ኢሳዴሰካ ያሳ ኪያቴላ ፓጮንታ ማላ ቃሴካ ጫዋ አይሬ አይሬዛ ሚላ ሞኪዲ ሜቶ ሜዶንታ ማላኔ ዳርታ ሞሮንታ ማላ ናጌቴቴ። * 16 ኢሲቶ ማና ካላሰ ባ ባይራቴላ ባይዚዳ ኤሳዌ ማላ አንቴሬ ኦኒካ ላይማቴዛዴ ዋይኮ ያሴ ቦንቸንታዴ ጊዲ ቤቶንታ ማላ ናጌቴቴ። *- 17 ኤሳዌይ ጉዬፔ ካሴ ባ አንጀዛ ላታናሰ ዛሪ ኮዩን ኢዛሰ አሜቶንታ ዳጌቴዳይሳ

* 12:12 አሳ 3:3 * 12:13 ለጦ 4:26 * 12:15 ዛሬ 29:18 *- 12:16 ሜዴ 25:29-34

እንገባ ስራታ። ኢዚ ባና ጋኪዛ ኣንጀዛሰካ ዳር ዩኪሽ ኮዩዲካ ዛሬ ዴማናሰ ዳንዳይቤና። **

18 ኩሽን ቦቲኮ ቦሽቲዛ ታማይ ኢዛ ቦላ ኦጂዛ ሲና ዙማኮ ሄ ጳማኮ፣ ሄ ቱላሌዛኮኔ ሄ ጎቴ ጫርኮዛኮ እንገባ ጋኪቤይኬታ።

19 እንገባ ዛዬ ገሪሳኮ ዋይኮ ሃይላን ሲዬቲዛ ቃላ ገሪሳኮ ጋኪቤይኬታ። ሄሳ ሲዩዳ ኣሳቲካ ሃራ ቃላ ጉጅንታ ማላ ዋሲዳ።

20 ሃሳሰ ጋሶይካ “ሃራይ ኣቶሺን ማህይካ ዙማ ቦቲዛ ገዲኮ ሹቻን ጫዴቲ ሃይቆ” ገዛ ኣዛዘዛ ኣሳይ ናጋናሰ ዳንዳይቤና።

* 21 ሄ ዋዴ ሄን ሃኒዛይሲ ዉሪካ ዳር ባቢሲዛይሳ ገዲዳ ገሽ ሙሴይካ “ታ ባባዳ ኮኮራዲሰ” ገዴሰ።

22 እንገባ ቃሴ ሃ ደዮኔ ዙማ ቦላ፣ ፑዴ ሳሎ ዩሩሳላሜ፣ ዴዎ ያሳ ካታማ ኡፋይሳን ሸቂዳ ቆዳይ ባይንዳ ከታንቻታኮ ዩዴታ።

23 ኢሰታ ሱንጲ ሳሎን ያፊቲዳ ባይራታ ማባራንጎ፣ ኡባሰ ዳና ገዲዳ ያሳኮ ኢሰታ ቦላ ዋሶይ ባይንዳ ደሎ ኣሳታ ሸምፖይ ዲዛሰ ማቲዴታ።

24 ኦራላ ጫቆን ማቃዩንጲዛ ዩሱሳኮ ሃሳላካ ኣቤሌይ ሺሺዳ ሱላፊ ኣጂዛ ጫቆ ቃላ ዮቲዛ ኣራጨቲዳ ሱላኮ ጋኪዴታ። *

25 እንገባ ዮቲዛይሳ እንገባ ኣካይ ጎንታ ማላ ናገቲቲ፣ ሄይታንጎቲ ያሲ ቢታ ቦላ ዲዛ ኣሳ ባጋራ ኢሰታሰ ዮቲዛይሳ ኤኮንታ ኢዲዲ ኢዛፔ ኣታናሰ ዳንዳዮንታ ኣገኮ ኦኒ ሳሎፔ ዩዳይሲ ኦሰ ዮቲሺን ኦ ኤኮንታ ኢዲኮ ኢዛፔ ዋኒዲ ኣታኔ?

* 26 ሄ ዋዴ ቃላ ገሪሳን ቢታ ቃሊዴሰ። ሃዲ ቃሴ ቢታ ያላላ ገደንታ ታ ሳሎካ ቃሴካ ዛራዳ ኢሲቶ ቃላና” ገዛ ቃላ ዮቲ ዋሊዴሰ።

* 27 ሃይሲ “ቃሴካ ታ ዛራዳ ኢሲቶ” ገዛ ቃላይ ኦና ቤሲዛይ ቃዮንታይቲ ማኒ ዳና ማላኔ ቃዲዛይቲ ሄይቲካ ማጴቲዳይቲ ኪቻናይሳ ቤሴሰ።

28 ሃሳ ገሽ ኦኒ ሙሌካ ቃዮንታ ካዋቲል ላታና ገሽ ኣኔ ያሴ ጋላቶሰ። ቃሴካ ኢዛ ኡፋይሲዛ ኦጌራ ቦንቾሲኔ ያሻቲላን ኣኔ ኢዛሰ ጎይኖሰ።

29 ኦ ያሳይ ፀገዛ ታማ ማላ። *

* 12:17 ዴማናሰ ዳንዳይቤና ማሬታናሰ ኣይኮ ኢዲሌ [ቃዳ] ዴሚቤና ጉሳ።
* 12:17 ሜዴ 27:30-40 * 12:20 ኬሳ 19:12-13 * 12:24 ሜዴ 4:10 * 12:25 ኬሳ 20:22 * 12:26 ሃጌ 2:6 * 12:29 ዛሬ 4:24

13

ወርሴላ ዞሪ

1 ኢንቴ ኢንቴ ጊደን አሻታ ማላ ደሴቲቴ። 2 አማላ ሞኮ ባሎፕቴ፤ ኢሲ ኢሲ አሳቲ ሃሳሶ ኦሊሼ ኤርንታ ኪታንቻታ አማላቴሰ ሞኪ ኤኪዳ። * 3 ቃሾ ኬላን ዲዛይታራ ኢንቴካ ቃሹቲዳ ማላ ኢሰታሰ ቆፕቴ። ሃሳሶካ አሳ ኩሼን ዋዬቲዛይታራ ኢንቴካ ዋዬቲዛ ማላ ኢሰታሰ ቆፕቴ።

4 ኤኮይ ጌሎይ ኡባ አሳ አቻን ቦንቼቶ። ኢንቴ ሃሌይ ጌሽ ጊደ። ጋሶይካ ላይማ አሞይ ዲዛይታኔ ላይማቲዛይታ ቦላ ያሲ ፕርዳና።

5 ሚሻ ሲቆፕ ናጌቲቴ። ኢንቴሰ ዲዛይሲ ጊደና፤ ሃሳሰ ጋሶይ ያሲ “ታ ኢንቴና ሙሉካ አገኬኔ ዩገኬ” ጊደሰ። * 6 ሃሳ ጊሽ ኩሜላ ዋዘናፕ ኑኒ “ሳዲይ ታሰ ማዶ፤ ታ ባቢኬ። ታና አሲ አይ ኦላና ዳንዳዪኬ?” ጎሰ። *

7 ኢንቴሰ ያሳ ቃላ ኮይርፕ ዮቲ ካሌሊዛይታ ባሎፕቴ። ኢሰታ ዲሳን ቤቲዛ ሎዎ አይፌይ ዲዛይሳ ዩሺ ቆፕቴ። ኢንቴካ አማኖን ኢሰታ ሚሳቲቴ። 8 ዬሱሰ ኪርሰቶሲ ሃቺካ ዎንቶካ ሚርናሰካ ኢዚ ኢዛኮ! 9 ዲማ ዲማ አማላ ቲሚርቴ ኤኮፍቴ፤ ኑ ዎዘናይ ሚኒ ኤቁዛይ ያሳ ኪያቴላን አቲን ካላ ዎጋ ናጎን ጊደና። ሃሳ ሄ ዎጋ ናገዛይቲካ ኢዛን ጎዔቲቤቲና።

10 ኑሰ ያርሾሶይ ዳሰ። ጊዲኮካ ዲንካኔዛ ጊደን ኦሊዛ ቄሴቲ ሄ ያርሾሶዛ ቦላ ዲዛ ካላፌ ኤኪ ሞንታ ማላ ዲጌቲዳ። 11 ቄሴታ ሃላቃይ ናጋራ ቴቁዛ ሜሄ ሱሰ ኤኪዲ ኡባፌ ዲማ ጌቲቲዛ ኪፊሌ ጌሌሰ። ሜሄታ አሾይ ጊዲኮ ካታማፕ ካሬን ፀጌቲሰ። * 12 ሃሳሶካ ዬሱሲ ባ ሱላ ባጋራ አሳ ጌሻናሰ ካታማ ፕንጌፌ ካሬን ሜቶ ቤዪዳሰ።

13 ሃሳ ጊሽ ኑካ ኢዚ ቶኪዲ ካወሻቲላ ቶኪዳ ኑ ዲዛሶፕ ጌዴ ኢዛኮ ካሬ አኔ ኬዘሰ። 14 ጋሶይካ ሃይሳን ኤቁ ዳና ካታማይ ኑሰ ዳና። ጊደ አቲን ቡር ሲንሳፌ ያና ካታማዮ ናጎሰ። 15 ሃሳ ጊሽ ኡባ ዎዴ ጋላታ ያርሾ ሃሲካ ኢዛ ሱንሳሰ ማርካቲዛ ኑ ዲናፕ ቤቲዛ አይፌ ጊዲዳዝ ዬሱሳ ባጋራ ያሳሰ አኔ ሺሾሰ። 16 ቃሴካ ሎዎ ኦሶኔ ኢንቴሰ ዲዛይሳፌ ሃራታሰ አሞ ባሎፕቴ። ያሲ ሃይታንታ ማላ ያርሾን ኡፋዬቲሰ።

* 13:2 ሜዴ 18:1-8፤ 19:1-3 * 13:5 ዛሬ 31:6፤8፤ ኢያ 1:5 * 13:6 ማዛ 118:6 * 13:11 ለዌ 16:27

17 እንገናኝ ካሌሊዛይታሰ አዛዜቲቲኔ ሃሳሰ ጋሶይካ እንገናኝ ጊሽ ኢሰታ አላፊቴላን ዳሮ ኮይቸዛ ጉዳይ ዲዛ ጊሽ እንገናኝ ሼምፖ ጊሽ ዳሮ ባጭቲቲሰ። ሃሳ ጊሽ ኢሰቲ ባ ኦሊዛ ኦሶዛ ላንጨቴሼ ጊደንታ ኡፋይሳን ኦላና ማላ እንገናኝ ኢሰታሰ አዛዜቲቲ። እንገናኝ ሃሳሶ ሂሰቶንታ ኣጊኮ እንገናኝ ሎዔና። 18 ኦሶካ ዋሲቲ። ኡባሶራካ ሎዎ ዲሰ ዳናሰ ላሞቲዛ ሎዎ ቆፋይ ኦሰ ዲዛይሳ ኦ ሲጶኮ። 19 ሃራፔካ ታ እንገናኝ ኤሌን ሲማ ባና ማላ ታሰ እንገናኝ ዋሳና ማላ ሃዳራ ጋይሰ።

20 ደርሳታ ሃንላንቻይ ዋጋ ጎዳ ዩሱሰ ኪርሰቶሳ ባ ሜርና ጫቆ ቃላ ሱላን ኢዛ ሃይቆፔ ዴንሊዳ ሳሮቲሳ ያሲ፣ 21 እንገናኝ ኢዛ ሼኔ ፖላና ማላ ሎዔቲላን እንገናኝ ጊደሶ። ያሳ ኡፋይሲዛይሳ ዩሱሰ ኪርሰቶሳ ባጋራ ኦናን ኦሶ። ኢዛሰ ሜርናፔ ሜርናሰ ቦንቸይ ጊደ። አሚን። 22 ታ ኢሻቶ! እንገናኝ ያፊዳ ዞሬ ቃላይ ጉሐ ጊዲዳ ጊሽ እንገናኝ ሃንቄቶንታ ማላ ታ እንገናኝ ሃዳራ ጋይሰ። 23 ኦ ኢሻ ጂምቶሲ ቢርሼቲዳይሳ እንገናኝ ኤራና ማላ ታ ኮያይሰ። ኢዚ ኤሶን ታኮ ዪኮ ታ ኢዛራ ሄ ባዳ እንገናኝ ሃን ቤያና።

24 እንገናኝ ካሌሊዛይታ ኡባታሲኔ አማኒዛ አሳ ኡባሰ ታ ሳሮካ ዮቲቲ። ኢፃሊያን ዲዛ አማኒዛ አሳይካ እንገናኝ ሳሮ ጌሰ። 25 ያሳ ኪያቲሊ እንገናኝ ጊደ። አሚን።

ኦሪሳ ጩቆ ማግኔ ጋሞላ

New Testament in Gamo (ET:gmv:Gamo)

copyright © 2011 Wycliffe Bible Translators, Inc.

Language: Gamo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gamo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 29 Sep 2022 from source
files dated 29 Jan 2022
dffa0cbb-5f77-5875-bf95-f4176677af45